



Stručna služba općinskog vijeća i općinskog načelnika

Broj: 01/1-02-2266/17  
Ilijaš, 28.09.2017. godine

**PRIJEDLOG**

**Z A P I S N I K**

sa 12. (dvanaeste) sjednice Općinskog vijeća Ilijaš, održane dana 28.09.2017. godine, sa početkom u 10:00h.

Dvanaestom sjednicom Općinskog vijeća Ilijaš predsjedavao je zamjenik predsjedavajućeg OV-a Ilijaš g-din Alen Hasković.

Prisutni vijećnici:

<b>RB.</b>	<b>IME I PREZIME</b>
	<b>SDA</b>
1	-
2	ANEL BUMBULOVIĆ
3	MUAMER DERVIŠEVIĆ
4	ALMA OMERović
5	MEHMED SINANOVIĆ
6	-
7	SAUDIN DURMIĆ
8	-
9	SEMIr DEDIĆ
10	HALID DIZDAREVIĆ
11	RASIM ŠEHIĆ
12	-
13	ALEN HASKOVIĆ
	<b>SDP</b>
14	ALAN ŠERAK
15	DAMIR FILIPOVIĆ
16	MIRSAD OSMANOVIĆ
	<b>SBB-FAHRUDIN RADONČIĆ</b>
17	AKIF BEŠLIJA
18	SEAD ŠEHIĆ
	<b>BPS-SEFER HALILOVIĆ</b>
19	MUHAMED HANDŽIĆ
20	ALMIR ŠPIODIĆ
	<b>GS</b>
21	EDHEM HASANOVIĆ
22	ASIM MUJIĆ
	<b>SAMOSTALNI VIJEĆNIK</b>
23	-
	<b>LDS</b>
24	MEHO DŽINDO
	<b>STRANKA ZA SREDNJE</b>
25	-

Odsutni vijećnici:

1. Mahir Dević
2. Adem Alić
3. Armin Matoruga
4. Melisa Matoruga
5. Semir Dizdarević i
6. Besim Gljiva

Prisutni gosti:

1. Nermina Durić-Kahvedžić - Radio Ilijaš
2. TV SA
3. TV Vogošća

Ostali prisutni:

1. Akif Fazlić – općinski načelnik
2. Sanja Zagorac-Jozić – pomoćnik načelnika
3. Sadeta Brkić – pomoćnik načelnika
4. Meliha Avdibegović – pomoćnik načelnika
5. Merima Osmanović – pomoćnik načelnika
6. Zdravko Barić – pomoćnik načelnika
7. Nijaz Spahić – pomoćnik načelnika
8. Aziz Fazlić – pomoćnik načelnika
9. Ilda Kahriman – sekretar OV-a Ilijaš
10. Nejra Ćosić - volonter
11. Đenan Suša – IT administrator
12. Maida Fazlić- zapisničar

ALEN HASKOVIĆ – zamjenik predsjedavajućeg OV-a

Otvorio je sjednicu i konstatovao da postoji kvorum za odlučivanje (prisutno 19 vijećnika).

Zatim je dao na razmatranje zapisnik sa 11. sjednice OV-a.

Primjedbi na zapisnik nije bilo, pa je Općinsko vijeće jednoglasno usvojilo zapisnik sa 11. sjednice OV-a Ilijaš.

Pročitao je predloženi dnevni red i dao na razmatranje.

AKIF FAZLIĆ – općinski načelnik

Predlagač povlači tačku 5., 6. i 7. predloženog dnevnog reda, jer nisu stvoreni uslovi da ih možemo danas razmatrati.

Kada je u pitanju tačka 5., nije dostavljena studija koja je trebala biti dostavljena, a kada su u pitanju tačke 6. i 7., investitor nije dao konačnu saglasnost na uplatu finansijskih sredstava koju smo definisali ovim odlukama. Dakle, želim pojasniti da ne ovisno od toga što kantonalni zakon nije propisao obavezu uplaćivanja bilo koje vrste naknada kod dodjela prethodnih saglasnosti, da mi kao općina insistiramo na tome, a prije svega na ozbiljnosti ponuda sa kojima one idu da kroz određena sredstva ta ozbiljnost ponuda se i potvrdi. U cjelokupnom procesu pregovaranja i pripreme ovih tačaka kada su u pitanju mini hidrocentrale, investitor je znao za tu poziciju. Zapravo, mi smo imali jedan zajednički

sastanak Kolegija i predstavnika političkih partija u aprilu, gdje smo naglasili da za investitore važi ova vrsta zahtjeva. Taj zahtjev je bio u osnovi prihvaćen, ali zbog određenih dilema koje jesu objektivne naravi, jer u Kantonu Sarajevo su vrlo složene procedure dobijanja koncesionih ugovora. Investitor je odlučio da ovo prolongira i uđemo u dalje razgovore i zajedno ćemo procijeniti za općinu Ilijaš, ako dokažu tu ozbiljnost da će se sve to pokrenuti da nađemo neki modalitet, jer ovi novci nam ništa drugo ne znače, osim ozbiljnosti investitora u smislu realizacije projekata.

Primjedbi i prijedloga za dopunu dnevnog reda više nije bilo, pa je OV-e jednoglasno usvojilo slijedeći

### **DNEVNI RED**

1. Vijećnička pitanja i inicijative
2. Izvještaj o realizaciji zaključaka sa 11. sjednice
3. Izvještaj o izvršenju Budžeta općine Ilijaš za period 01.01.2017.-30.06.2017. godine
4. Prijedlog Odluke o davanju saglasnosti na plan utroška namjenskih sredstava prikupljenih po osnovu naknade za korištenje državnih šuma
5. Prijedlog Plana stipendiranja izuzetno nadarenih učenika u srednjem i studenata u visokoškolskom obrazovanju u školskoj 2017/2018. godini
6. Prijedlog Plana stipendiranja učenika u srednjem i studenata u visokoškolskom obrazovanju u stanju socijalne potrebe u školskoj 2017/2018. godini
7. Prijedlog odluka o:
  - a) usvajanju Regulacionog plana "Gornji Kadarići"-Ilijaš
  - b) provođenju Regulacionog plana "Gornji Kadarići"-Ilijaš
8. Nacrt Odluka o:
  - a) usvanju Regulacionog plana "Apartmansko naselje Sovrle 2"-Ilijaš
  - b) provođenju Regulacionog plana "Apartmansko naselje Sovrle 2"-Ilijaš
9. Prijedlog Rješenja iz imovinsko-pravne oblasti:
  - a) broj:06/1-31-294/17
  - b) broj:06/1-31-609-1/17
  - c) broj:06/1-31-701/17
  - d) broj:06/1-31-893/17
  - e) broj:06/1-31-1402/17
  - f) broj: 06/1-31-1879/17
  - g) broj:06/1-31-3195/17

AD-1

Vijećnička pitanja i inicijative

SAUDIN DURMIĆ – vijećnik SDA

Inicijativa:

1. U ime Kluba vijećnika SDA Ilijaš pokrećem inicijativu prema Direkciji za puteve Kantona Sarajevo da riješe problem umirenja saobraćaja, odnosno smanjenja brzine kretanja motornih vozila na dionici puta R-444 lokalitet Podlugovi od pružnog prelaza – raskrsnica za Brezu na način postavljanja usporivača brzine (na identičan način kao kod Osnovne škole u Starom Ilijašu).

Obrazloženje: Na pomenutom lokalitetu je pješački prijelaz koji uglavnom koriste djeca koja pohađaju nastavu u Osnovnoj školi "Podlugovi", a koja dolaze iz dijela Podlugova,

Ljubnića i Lješeva. U cilju zaštite života djece i bezbjednog prelaska saobraćajnice, neophodno je inicijativu u što skorijem periodu realizovati.

Shodno Poslovniku Općinskog vijeća Ilijaš, inicijativu predlažem kao zaključak Općinskog vijeća i od gore pomenute Direkcije za puteve tražim očitovanje do naredne sjednice Općinskog vijeća Ilijaš.

MUHAMED HANDŽIĆ – vijećnik BPS-Sefer Halilović

Pitanja:

1. Zašto se građanima općine Ilijaš koji žive u područjima gdje nije obezbjeđen prijem RTV signala šalju računi za naplatu RTV takse?

Obrazloženje: Kao primjer navodim naselje Gornja Bioča gdje RTV signal nikada nije uspostavljen iako su građani u više navrata zahtijevali uspostavu istog. S tim u vezi, tražim jasan odgovor od nadležnih kada će RTV signal u navedenim područjima biti obezbjeđen i zbog čega šalju račune za nešto što građani ne koriste?

2. Zašto naša policija dozvoljava instaliranje tezgi i parkiranje motornih vozila uz sami pružni prijelaz na Alića rampi u vrijeme pijace (subota)?

Obrazloženje: Naime, svake subote – u vrijeme pijace veliki je rizik prelaza preko pruge na Alića rampi kako za motorna vozila tako i za pješake, a kao glavni ometač navodim upravo postavljene tezge i parkirana motorna vozila na pomenutom mjestu.

ALMIR ŠPIODIĆ – vijećnik BPS-Sefer Halilović

Pitanja:

1. Kada će krenuti radovi na rekonstrukciji društvenog doma u Podlugovima, koji je planiran budžetom općine za 2017. godinu i operativnim planom načelnika?  
Imao sam informaciju da se u maju trebao raspisati tender za izvođača radova, s tim u vezi postavlja se pitanje.  
Da li je uopće raspisan tender, da li je odabran izvođač radova, ako jeste kada će radovi početi i kada se očekuje završetak radova?
2. Postavljam pitanje službi za komunalne poslove općine Ilijaš, zbog čega izvođači radova na putevima ne vrate iste u prvobitni položaj nakon završetka radova?

Obrazloženje: Nedavno je firma koja radi priključke električne energije za Elektrodistribuciju izvršila presjecanje puta i polaganje kablova za priključak domaćinstava, na putu prema naselju Doci koji je prošle godine asfaltiran i nisu ga ponovno asfaltirali i vratili u prvobitno stanje.

Isti slučaj se desio i prošle godine na putu prema Sovrlama kod katoličkog groblja gdje su presjekli put i nikada ga nisu vratili u prvobitno stanje. Na isti način su vršili priključke i u naselju Obala gdje također nisu vratili puteve u prvobitno stanje.

AKIF BEŠLIJA – vijećnik SBB-a

Pitanje:

Shodno inicijativi pokrenutoj na prošlim sjednicama, a sve u vezi dionice puta od mosta i

skretanja za Vratušu, pa sve do Polomske ulice u Podlugovima, te odgovorom koji ste mi dostavili postavljam slijedeće pitanje:

1. Kada je planirana sanacija pomenute dionice puta, kao i čišćenje kanala za otpadne vode?

Obrazloženje: S obzirom da se pomenuta problematika oko ove dionice povlači iz sjednice u sjednicu i tako godina dana, molio bih vas da se tačno precizira kada će se pristupiti sanaciji oštećenih dijelova, kao i onih dijelova koji su sanirani, a već su propali, kao i čišćenje kanala. Napominjem, a u prilogu ovog pitanja dostavljam odgovor od 29.11.2016. godine, a u kojem stoji da ukoliko vremenske prilike budu dozvoljavale izvršit će čišćenje kanala i sanacija oštećenja, pa kako se približava mjesec novembar, bilo bi dobro da se isto uradi, kako vremenske prilike ne bi bile opet prepreka.

**Prilog: Odgovor na vijećnička pitanja i inicijative sa 2.sjednice Općinskog vijeća Ilijaš održane dana 29.11.2016. godine**

DAMIR FILIPOVIĆ – vijećnik SDP-a

Pitanja:

1. Obzirom da je u avgustu 2016. godine općinski načelnik najavio da će na proljeće 2017. godine započeti gradnja najvećeg Outlet centra u regionu na 57.000 m<sup>2</sup> u Ljubnicima koji bi u prvoj fazi trebao zapošljavati 300 radnika, a u završnoj 500 radnika, zanima nas kao i građane općine Ilijaš u kojoj fazi se nalazi grandiozno najavljeni projekat, da li je općinski načelnik u kontaktu sa investitorima, sa ambasadorom BiH u Kuvajtu koji je posredovao sporazumu, te da li sporazum obavezuje investitora ili se radilo o jeftinom skupljanju političkih poena u izbornoj godini?
2. Zanima nas koliko je pronađeno nestalih lica sa prostora općine Ilijaš od 2008. godine do danas?
3. Kada se namjerava izvršiti pružanje kanalizacione mreže u MZ Kamenica? (Pitanje preuzeto od građana MZ Kamenica).
4. Molimo vas da nam dostavite spisak firmi koje su sklopile ugovore sa općinom Ilijaš u iznosu većem od 6000,00 KM po osnovu Zakona o javnim nabavkama BiH od avgusta 2016. godine do avgusta 2017. godine sa upisanim iznosima za svaki zaključen ugovor? (Odgovor tražim od Agencije za javne nabavke).
5. Da li općinski načelnik namjerava izvršiti asfaltiranje puta prema Buljetovini?
6. Obzirom da smo postavili pitanje za postavljanje table na ulazu i izlazu MZ Ljubina, zanima nas u kojoj fazi se nalazi navedeno?

Inicijativa:

1. Upućujemo inicijativu da se u Buljetovini postavi rasvjetna jedinica?

Pitanje:

Na zahtjev grupe građana Donje Karaule, postavljam slijedeće pitanje:

1. Kada će u naselju Donja Karaula općinske vlasti postaviti tri stuba i tri sijalična grla? Naime, kako građani ovog dijela Donje Karaule navode da im je to obećano prije godinu dana, također sumnjaju da zbog toga što su prognanici sa područja Sokoca i Vlasenice nisu u prioritetu rješavanja svojih problema. Kako navode, Ilijaš su odabrali kao svoju opštinu življenja, međutim sve više sumnjaju da su građani drugog reda. Stoga vas mole da ispunite njihove zahtjeve kako ne bi poduzimali radikalne mjere, odnosno proteste. Također su zahtijevali da navedem i njihova imena:  
- Bulbul Halid, Bulbul Hamdija, Klico Šahim, Klico Adnan, Arifović Zada, Šabić Nuraga, Kulić Asim, Kulić Zuhdija, Oruč Ramiz i Oruč Jasmin.

ALEN HASKOVIĆ – zamjenik predsjedavajućeg

Dao je na glasanje prijedlog zaključka Saudina Durmića.

Općinsko vijeće je jednoglasno usvojilo

#### ZAKLJUČAK

Traži se od Direkcije za puteve Kantona Sarajevo da riješe problem umirenja saobraćaja, odnosno smanjenja brzine kretanja motornih vozila na dionici puta R-444 lokalitet Podlugovi od pružnog prelaza – raskrsnica za Brezu na način postavljanja usporivača brzine (na identičan način kao kod Osnovne škole u Starom Ilijašu).

#### AD-2

Izvještaj o realizaciji zaključaka sa 11. sjednice

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo

Izvještaj o realizaciji zaključaka sa 11. sjednice

#### AD-3

Izvještaj o izvršenju Budžeta općine Ilijaš za period 01.01.2017.-30.06.2017. godine

MERIMA OSMANOVIĆ – pomoćnica načelnika

Za izvještajni period 01.01.do 30.06.2017 Budžet općine Ilijaš je ostvario 8.264.013,00 KM prihoda i primitka, što je 55 % od planiranih prihoda u Budžetu za 2017. godinu. Porezni prihodi u izvještajnom periodu su ostvareni u iznosu od 2.566.844,00 KM ili 49 %. Radi se o prihodima po osnovu poreza na prihod od imovine i imovinskih prava, poreza na nepokretnosti i prava, prihodi po osnovu indirektnih poreza, porez na dohodak i ostali porezi. Kada se tiče neporeznih prihoda, u odnosu na ukupne prihode su ostvareni u procentu od 66 % ili 1.463.014,00 KM. U ukupnoj strukturi ovih prihoda najveći prihodi su ostvareni po osnovu ostalih prihoda od imovine, administrativne i komunalne takse i prihoda po osnovu

pružanja javnih usluga.

Prenesena namjenska sredstva iz prethodne godine iznose 872.364 KM prenesena sredstva po tekućem prilivu iz prethodnog perioda iznose 2.194.661,00 KM.

Ostvareni izdaci su 4.042.728,00 KM, što predstavlja 27 % od planiranih izdataka .

Prema tome ostvaren je suficit u iznosu od 4.042.728,00 KM (kojeg dakle čine i prenesena sredstva iz prethodne godine u iznosu od 872.364 KM i prenesena sredstva po tekućem prilivu iz prethodnog perioda 2.194.661 KM) .

U ukupnoj strukturi ovih prihoda najveći prihodi su ostvareni po osnovu ostalih prihoda od imovine, administrativne i komunalne takse i prihoda po osnovu pružanja javnih usluga.

Tekući transferi od KS su ostvareni u iznosu od 358.370,00 KM što u odnosu na plan i predstavlja izvršenje od 54 % a odnose se na sredstva po osnovu Zakona o dopunskim pravima boraca i prevoza učenika.

Prihodi od donacija iznose 66.600,00 KM ili 61 % a odnose se na (učešće građana u realizaciji infrastrukturnih projekata kao i JU "Zaštićena područja za realizaciju projekta na području Bijambara.)

Tekući transferi od ostalih nivoa vlasti su ostvareni u iznosu od 651.000 KM što predstavlja 20% od ukupno planiranih a odnose se na Ministarstvo komunalne privrede za realizaciju projekata javne rasvjete na području IZ i Malešića, (30000 KM), rekonstrukciju filterskog postrojenja na Karašnici (500. 000) i projekat Ministarstva zdrastva energetske efikasnosti za blok II doma zdravlja(121. 000).

Kapitalni primici od prodaje zemljišta ostvareni su u iznosu od 91.160,00 KM što predstavlja 13 % od plana Budžeta općine za 2017.god.

Kada se tiče rashodovne strane Bruto plaće i naknade uposlenim izvršene su u iznosu od 831.432,00 KM i predstavlja 45 % dok sredstva za naknade ostvarena u iznosu od 47%, a doprinosi na planiranom godišnjem nivou.

Izdaci za materijal i usluge izvršeni su u iznosu od 405.614,00 KM što je 39 % planiranih sredstava na godišnjem nivou.

Kada se tiče pozicije tekući transferi, evidentirani su izdaci u iznosu od 959.383,00 KM što u odnosu na prošlu godinu iznosi uvećanje za 10 %.

Kapitalni transferi i izdaci su ostvareni u iznosu od 1.724.731,00 KM što je 19 % od planiranog godišnjeg iznosa, kroz koje su realizovani brojni projekti prikazani kroz analitiku, a koji su omogućili rješavanje brojnih problema građana i koji doprinose poboljšanju uslova i ugodnijeg življenja u općini Ilijaš.

Budžetska rezerva planirana utrošena u iznosu od 44.515,00 KM i to za rješavanje stambenog zbrinjavanja, pomoći za liječenje kao i pomoći za sanaciju štete nastale na zasadima voća kao posljedice niskim proljetnih temperatura (mraza i snijega)

Obzirom da je ovo bio period kada se donosi Budžet, Operativni plan Načelnika, Plan nabavki, kao i period kada se pokreću i provode Zakonske procedure za realizaciju projekata, pogotovo ZJN, razumljivo je da nismo imali značajnije realizacije kapitalnog dijela Budžeta. Ostvarivanjem zakonskih preduslova kao i sa nastupom građevinske sezone kreće i realizacija ovih projekata koji će omogućiti rješavanje brojnih problema i koji će doprinijeti poboljšanju uslova i ugodnijeg življenja u općini Ilijaš.

MUHAMED HANDŽIĆ – vijećnik BPS-Sefer Halilović

Ja imam nekoliko pitanja po ovoj tački, moje prvo pitanje jeste rekonstrukcija javne rasvjete na području industrijske zone Malešići. Ja ne znam gdje je ta industrijska zona i ne znam da li ona postoji uopće ili je tehnička greška, možda se radi o industrijskoj zoni Luka? Vidimo da su oronuli ovi vjerski objekti u ovo godinu ili proteklih godina u Općini Ilijaš i skoro da nema ni jednog vjerskog objekta koji nije dobio 4.000, 5.000, 10.000 KM za

njegovu sanaciju, da li je to zaista tako, treba vidjeti. Što se tiče sanacija šteta od elementarnih nepogoda, znamo svi da su one bile krajem aprila početkom maja, veliki mrazevi, snježne padavine, ovdje imamo 4 zahtjeva i 4 korisnika su dobili naknade za štete. Pitam da li je bilo još zahtjeva i je li trebalo još korisnika ove naknade, obzirom da znamo da je Ilijaš općina sa dobro razvijenom poljoprivredom i da su građani Ilijaša i domaćini koji imaju poljoprivredna dobra, dobro i pretrpjeli štete u maju i aprilu mjesecu. Moje slijedeće pitanje jeste realizacija budžeta za proteklih šest mjeseci je kao što vidimo 27 % ili nešto malo više od pola planiranog, šta je u pitanju, je li nemogućnost da se realizuju svi projekti koji su planirani budžetom Ilijaš i operativnim planom načelnika ili je nešto drugo u pitanju? Bojim se da ne budemo u situaciji da pola budžeta prebacimo u slijedeću godinu koja je izborna godina pa možda da sredstva uštedimo malo i u te svrhe.

AKIF FAZLIĆ – općinski načelnik

Dakle industrijska zona Malešići je tehnička greška. Ja znam da smo mi intervenisali na javnoj rasvjeti u industrijskoj zoni željezara, pošto je neko sa visokim mašinama potpuno uništio jedan dio javne rasvjete, tu se vodi postupak. Imaju u policiji zapisnici, institucije vode postupak protiv počinioca štete, pošto je to sve dugo trajalo mi smo u jednom momentu intervenirali zajedno sa kantom i to riješili. Konkretno ne znam ali možemo to vidjeti i pojedinačno sa uvaženim vijećnikom. Kada je u pitanju pozicija vjerski objekti, mi svake godine na ovom nivou sredstava potpomažemo sve vjerske zajednice i to možete vidjeti i po onome kako raspoređujemo, nastojimo da sve konfesije dobiju određeni dio sredstava. Znamo da je u ovim godinama bila intezivna gradnja vjerskih objekata, da je bila rekonstrukcija i zaštita ovih postojećih, predlažemo i dijelom u zaštitu objekata u smislu nabavljanja video nadzora i niz drugih aktivnosti koje imaju vjerske zajednice i u osnovi nam je opredjeljenje da podržavamo rad vjerskih zajednica. Kada je u pitanju sanacija šteta nastala mrazevima, niskom temperaturom, mi imamo preko 800 prijavljenih poljoprivrednih gazdinstava, to je jedna stvar, a ovdje se radi o registrovanim poljoprivrednim proizvođačima koji su registrovani kao pravna lica. U jednoj takvoj situaciji smo se opredjelili da podržimo samo pravno registrovana lica jer oni su ti koji su ključni proizvođači i koji su pretrpjeli najviše štete. Sigurno bi bilo bolje da smo našli neke mogućnosti za još niz nekih proizvođača, to prije svega jesu proizvođači koji proizvode za svoje potrebe i dijelom što preostane u smislu robne proizvodnje i tržište.

Ključno, suštinsko pitanje jeste realizacija projekata i to se vidi u ovom izvršenju budžeta, naravno da sve procedure koje treba da se provedu u osnovi se provode u prvoj polovini godine, mi imamo sad gotovo za sve one navedene projekte koje smo stavili u operativni plan i u plan budžeta završene procedure. Dosta je projekata u intezivnoj fazi realizacije, jedan broj projekata treba da počne i nadam se da će ova pozicija i svako izvršenje budžeta biti puno povoljnije nego što je prvih pola godine, tu mislim na projekte iz oblasti vodosnabdijevanja i filter stanicu koja je sama blizu milion KM, a ovdje nije ni jedna marka definisana na bušotinu, biznis centar, pijacu za njih gotovo da nismo još ni marku isplatili. Kada gledamo ovaj izvještaj počelo je plaćanje u avgustu i septembru, tako da zaista ćemo nastojati da ovaj budžet ne samo sa prihodovne nego sa rashodovne strane realizujemo, jer to znači da je i realiziran projekat. Kada uporedite naše aktivnosti, u prethodnom i sadašnjem mandatu mi svoje budžete i operativne planove temeljimo na prioritetima, stalnim aktivnostima i da se ne može naći baš velika razlika između izbornih i neizbornih godina kada je u pitanju realizacija projekata. Tako da sigurno nema potrebe za takvom vrstom nastupa, bitno nam je da u kontinuitetu projekti idu i mi smo svjedoci da kada je u pitanju naša općina, većina projekata ide u kontinuitetu.

Diskutanata po ovoj tački dnevnog reda više nije bilo, pa je Općinsko vijeće većinom glasova usvojilo

Izveštaj o izvršenju Budžeta općine Ilijaš za period 01.01.2017.-30.06.2017. godine

#### AD-4

Prijedlog Odluke o davanju saglasnosti na plan utroška namjenskih sredstava prikupljenih po osnovu naknade za korištenje državnih šuma

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Odluku o davanju saglasnosti na plan utroška namjenskih sredstava prikupljenih po osnovu naknade za korištenje državnih šuma

#### AD-5

Prijedlog Plana stipendiranja izuzetno nadarenih učenika u srednjem i studenata u visokoškolskom obrazovanju u školskoj 2017/2018. godini

SANJA ZAGORAC-JOZIĆ – pomoćnica načelnika

U programu rada Općinskog vijeća za 2017 godinu za mjesec septembar, planirano je donošenje Plana stipendiranja nadarenih učenika i studenata i Plana stipendiranja učenika i studenata u stanju socijalne potrebe za školsku 2017/2018 godinu. Na početku bih rekla da Komisija za Statut i propise nije imala primjedbi na pravni osnov i pravno tehničku usklađenost predloženih materijala. U skladu sa članom 3. Pravilnika o stipendiranju nagrađivanju nadarenih učenika i studenata i člana 3. Pravilnika o stipendiranju učenika i studenata u stanju socijalne potrebe definisano je da Općinsko vijeće na prijedlog općinskog načelnika donosi Plan stipendiranja za jednu školsku godinu. U školskoj 2017/2018 godini planirano je stipendiranje 65 nadarenih učenika i 102 nadarena studenta, ukupno potrebna sredstva za realizaciju ovog plana su 121.050,00 KM.

Također stipendirat će se 36 učenika u stanju socijalne potrebe i 22 studenta u stanju socijalne potrebe. Ukupno potrebna sredstva za realizaciju ovog plana su 36.000 KM. Ukupna sredstva koja će biti potrebna za stipendiranje u školskoj 2017/2018 godini su 157.050,00 KM, a ukupno će se dodijeliti stipendija za 101 učenika i 124 studenta. Sredstva od 3.000 KM, plan je pravljen na osnovu dodjeljenja stipendija u školskoj 2016/2017 godini i budžetska stavka za stipendiranje je iznosila 160.000 KM, tako da ova sredstva od 3.000 KM nisu obuhvaćena Planom, bit će utrošena za dodjelu nagrada za najuspješnije učenike srednje škole, nosioce priznanja Zlatna značka Univerziteta u Sarajevu i za učenike koji su na kantonalnim i federalnim takmičenjima osvojili jedno od prva tri mjesta. Također bitno je napomenuti da nakon objave usvajanja ovog Plana i njegove objave u Službenim novinama kada on stupa na snagu će općinska služba pripremiti konkurs za stipendiranje učenika i studenata koji će biti objavljeni sredinom novembra. Očekujemo da će konkursna procedura biti završena krajem 2017 godine, a zaključivanje ugovora i njihova svečana dodjela bit će upriličena u povodu dana općine, krajem februara 2018 godine.

Diskutanata po ovoj tački dnevnog reda nije bilo, pa je Općinsko vijeće jednoglasno

donijelo

Prijedlog Plana stipendiranja izuzetno nadarenih učenika u srednjem i studenata u visokoškolskom obrazovanju u školskoj 2017/2018. godini

#### AD-6

Prijedlog Plana stipendiranja učenika u srednjem i studenata u visokoškolskom obrazovanju u stanju socijalne potrebe u školskoj 2017/2018. godini

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Prijedlog Plana stipendiranja učenika u srednjem i studenata u visokoškolskom obrazovanju u stanju socijalne potrebe u školskoj 2017/2018. godini

#### AD-7

Prijedlog odluka o:

- a) usvajanju Regulacionog plana "Gornji Kadarići"-Ilijaš
- b) provođenju Regulacionog plana "Gornji Kadarići"-Ilijaš

SAUDIN DURMIĆ - vijećnik SDA-a

U ime kluba SDA molim predlagača da u kratkim crtama objasni vezano za jedan Regulacioni plan i za drugi Regulacioni plan, isto tako u ime kluba SDA tražim od predlagača zbog ozbiljnosti daljih procedura jeli moguće da razmotrimo na nekoj od narednih sjednica i varijantu depozitnog osiguranja kao garanciju da će ta naselja, jer znamo da u razgovoru sa vama pomoćnice, dobio sam informaciju nedavno da mnogi dođu i kada usvoje dokumentaciju nema ih nigdje, tako da nam se ne bi dešavali slučajevi nekih megalomanskih investicija pa da se ljudi izgube. Ne bi bilo zgore da ove planske dokumente koje donosimo investicije u budućnosti malo i osiguramo na vid nekog depozita.

MELIHA AVDIBEGOVIĆ – pomoćnica načelnika

Odluka o pristupanju izradi RP "Apartmansko naselje Gornji Kadarići" Ilijaš donesena je na sjednici OV-a Ilijaš 2016. godine. Cilj izrade plana je da se za predmetno područje predloži nova organizacija prostora sa kompleksom objekata apartmanskog tipa, sa sadržajima društvene infrastrukture i opremi kvalitetnom saobraćajnom i komunalnom infrastrukturom. Površina obuhvata plana iznosi 6,7 h. Predmetni lokalitet karakterisan je kao stabilan, mjestimično uslovno stabilan i neznatnim dijelom kao nestabilan teren, a isti je slabo naseljen. Nacrt plana nudi gradnju 57 individualnih stambenih objekata, tri društvena objekta i četiri parkovske površine. Veličina parcele za stanovanje je od 535 do 1700 m<sup>2</sup>, na kojima je planirana izgradnja stambenih objekata tlocrtne površine 120 m<sup>2</sup>, spratnosti S+P+1. Planirani društveni objekti:

- sportsko-rekreativni centar MBGP 1360 m<sup>2</sup> (S+P+1) površine parcele 2860 m<sup>2</sup>,
- vjerski objekat MaxBGP 400 m<sup>2</sup>, P+S, površine parcele 1940 m<sup>2</sup>
- supermarket MaxBGP 1250 m<sup>2</sup>, spratnosti S+P+1
- četiri parkovske površine od 2380 m<sup>2</sup>

Područje je relativno slabo opremljeno odgovarajućim saobraćajnicama. Postojeće pristupne saobraćajnice potrebno je rekonstruisati, kako bi zadovoljile saobraćajne normative. Planom je predviđena glavna naseljska saobraćajnica širine 5,5 m u površini od 6409 m<sup>2</sup> na koju se vežu sekundarna naseljska mreža saobraćaja u površini od 2941 m<sup>2</sup> širine 5,5m. Snabdijevanje vodom planiranog naselja vršit će se iz postojećeg rezervoara "Ilijaš 2" preko planiranog distributivnog cjevovoda Q 150 mm u dužini od 2170 m.

Unutar obuhvata planiran je distributivni cjevovod u dužini 1065 m, pumpna stanica i potisni vod u dužini od 258 m za manji dio naselja. Planirana je separata kanalizaciona mreža u naselju. Otpadne vode odvođene se kanalom Q300 mm u dužini 1224 m u postojeći kanal Q 300 u naselju Kadarići, a oborinske vode kanalom Q 300 u dužini od 1205 m u postojeći ispušni rijeku Bosnu. Unutar naselja je planiran kanal za otpadne vode u dužini 1048 m, a za oborinske 1014 m.

Nacrt plana stavljen je na uvidu u trajanju od 15 dana i održana je javna rasprava.

Na nacrt plana nije bilo primjedbi. Snabdijevanje električnom energijom vrši se sa postojećih TS Kadarići i novom TS za naselje.

Pravni osnov za donošenje plana je:

- član 29. Zakona o prostornom uređenju kojim je regulisano da je odluka o provođenju plana sastavni dio plana,
- član 47. istog Zakona kojim je regulisano da Regulacione planove donosi Općinsko vijeće,
- statutarni osnov je član 23. i 55. Statuta općine Ilijaš prema kojem je regulisano da je općina, kao jedinica lokalne samouprave, nadležna za regulisanje pitanja iz oblasti prostornog uređenja i urbanizma.

Komisija za statut i propise i Komisija za prostorno uređenje, stambeno-komunalne poslove i ekologiju nisu imale primjedbi, te se OV-u Ilijaš predlaže usvajanje Plana i Odluka kako je i predloženo.

Diskutanata po ovoj tački dnevnog reda više nije bilo, pa je OV-e glasalo sa 12 glasova ZA, 4 GLASA PROTIV i 2 GLASA UZDRŽANA.

Konstatovano je da Prijedlog odluka o usvajanju Regulacionog plana "Gornji Kadarići"-Ilijaš i provođenju Regulacionog plana "Gornji Kadarići"-Ilijaš nije dobio potrebnu većinu glasova.

AD-8

Nacrt Odluka o:

- a) usvanju Regulacionog plana "Apartmansko naselje Sovrle 2"-Ilijaš
- b) provođenju Regulacionog plana "Apartmansko naselje Sovrle 2"-Ilijaš

Diskutanata po ovoj tački dnevno reda nije bilo, pa je OV-e sa 13 glasova Za, 3 GLASA PROTIV i 2 GLASA UZDRŽANA donijelo

## ZAKLJUČAK

1. Utvrđuje se nacrt Regulacionog plana "Sovrle 2", nacrt Odluke o provođenju Regulacionog plana "Sovrle " i nacrt Odluke o usvajanju Regulacionog plana "Sovrle 2".
2. Javni uvid na Nacrt Regulacionog plana "Sovrle 2", Nacrt Odluke o provođenju Regulacionog plana "Sovrle 2" i Nacrt Odluke o usvajanju Regulacionog plana "Sovrle 2" stavlja se na Javni uvid od 29.09.2017. do 13.10.2017 godine, a Javna rasprava na nacrt Regulacionog plana "Sovrle 2", Nacrt Odluke o provođenju Regulacionog plana "Sovrle 2" i Nacrt Odluke o usvajanju Regulacionog plana "Sovrle 2" održat će se 16.10.2017. godine

(ponedjeljak) u sali Općine Ilijaš, II sprat sa početkom u 14 sati.

3. Primjedbe, prijedlozi, sugestije i mišljenja svih zainteresovanih subjekata planiranja, MZ-a, potencijalnih investitora, građana, vijećnika Općinskog vijeća Ilijaš, dostavljaju se Općini Ilijaš, Službi za prostorno uređenje i stambeno komunalne poslove, koja organizuje i sprovodi javnu raspravu.

4. Služba za prostorno uređenje i stambeno komunalne poslove dužna je nakon sprovedene javne rasprave da podnese izvještaj Općinskom vijeću Ilijaš, o rezultatima Javne rasprave koji sadrži primjedbe, prijedloge i mišljenja kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni.

#### AD-9

Prijedlog Rješenja iz imovinsko-pravne oblasti:

- a) broj:06/1-31-294/17
- b) broj:06/1-31-609-1/17
- c) broj:06/1-31-701/17
- d) broj:06/1-31-893/17
- e) broj:06/1-31-1402/17
- f) broj: 06/1-31-1879/17
- g) broj:06/1-31-3195/17

#### SADETA BRKIĆ – pomoćnica načelnika

Pod tačkom a, imamo prijedlog rješenja kojim se predlaže utvrđivanje prava vlasništva u korist Kahriman Zakira sina Ramiza iz Ilijaša. U pitanju je primjena člana 61. Zakona o građevinskom zemljištu koji govori o utvrđivanju prava vlasništva na gradskom građevinskom zemljištu na kojem je dograđen poslovni objekat u ovom slučaju u niz Zanatskog centra na Banovcu. Zakon je svojom osnovnom odredbom predvidio da će Općinsko vijeće na građanskom zemljištu u državnom vlasništvu na kojem je izgrađena zgrada bez prava korištenja radi građenja za koju se naknadno može izdati urbanistička saglasnost, odnosno odobrenje za građenje, utvrditi pravo vlasništva u korist graditelja uz obavezu plaćanja naknada kako je to predloženo u ovom prijedlogu rješenja, naknada za građevinsko zemljište, naknada za uređenje i za prirodnu pogodnost kako je to predloženo u ovom prijedlogu rješenja. Pribavljena je naknadna urbanistička saglasnost, dato je pozitivno mišljenje Pravobranilaštva Kantona Sarajevo na ovakav prijedlog rješenja. Komisija za statut i propise nije imala primjedbe na ovaj prijedlog, stoga predlažem Vijeću da usvoji danas ovaj prijedlog rješenja.

#### DAMIR FILIPOVIĆ – vijećnik SDP-a

Ja ću se referirati na tri rješenja, pod c, d i e. Radi se o javnom dobru, odnosno javnom interesu kako je naznačeno, obzirom da zakon po mom ličnom mišljenju ne predviđa ovakav oblik javnog interesa ni članom 6. nije ni kao izuzetak, ukoliko se utvrdi uslužnost pojedinačno pravnog lica koje gradi ova apartmanska naselja i mi ovdje smatramo da ovdje ne postoji javni interes da se ide sa ovakvim rješenjem, ne znam kakvo je mišljenje Pravobranilaštva. Član 6. definiše u stavu 2. izuzetak gdje govori o pružanju vodovodne kanalizacione mreže, ukoliko se utvrdi javni interes. Po mom ličnom mišljenju smatram da nemamo argumente da ovo navedemo kao javni interes.

Član 14. definiše po pitanju Općinskog vijeća da donosi odluku o javnom interesu, mi ne donosimo odluku mi donosimo rješenje o konkretnom slučaju, a nismo naveli da je taj objekat koji je u izgradnji javni interes. Isto tako nismo definisali odlukom, na osnovu

planske dokumentacije koja ne zahvata katasterske čestice kuda bi trebale da prođe prvo vodovodna mreža pa ostalo.

SADETA BRKIĆ – pomoćnica načelnika

Ovo su pravna pitanja, jasno definisana i utvrđena Zakonom o ekspropijaciji zemljišta. Stojimo iza ovoga kao i pravno činjeničnim znanjem koje je prethodilo utvrđivanu ovakvog prijedloga.

AKIF FAZLIĆ – općinski načelnik

Radi se o tri rješenja koji regulišu vodovodnu i kanalizacionu mrežu koja će biti vlasništvo općine Ilijaš i služiti će za sve one koje može poslužiti u tim naseljima. Ovdje je drugo pitanje ko će investirati u izgradnju te mreže, hoće li općina direktno ili će naći partnerski odnos i sa onima kojima će također služiti ta mreža, a to su apartmanska naselja, ali suština je da po Regulacionom planu od zadnje tačke naselja ta mreža je u vlasništvu općine i tom mrežom će upravljati naše Javno komunalno preduzeće. Da li sada ovdje u pravnim formulacijama imamo uslovno neki propust da je trebalo da se naglasi, da se ovo radi u korist općine Ilijaš, to treba malo da se vidi.

SADETA BRKIĆ – pomoćnica načelnika

Tačkom 2. odnosno završnom odredbom u ovom rješenju, rečeno je korisnik nepotpune ekspropijacije za izgradnju čega je trebalo u ove tri tačke je općina Ilijaš, mislim da je precizirano sve. Kada se ustanovi rješenjem pravoslužnosti dalje provedbe ove odluke o javnom interesu tada će se precizirati nalog zemljišnom knjižnom uredu kako će se i provesti takva odluka. Ovdje je generalno rečeno da je to u korist općine Ilijaš.

DAMIR FILIPOVIĆ – vijećnik SDP

Nemojte misliti da ja ovo zlonamjerno, samo zbog pokretanja upravnog spora da ne dođe do tog jer u rješenju koje imamo pod brojem 701/17 kaže radi se o izgradnji vodovodne mreže za apartmansko naselje Ljubnići, ja samo kažem nema javnog interesa u ovom konkretnom rješenju barem kroz formulaciju ovoga. Načelnik nam je sada rekao da će to služiti i biti na raspolaganju općini, da na taj vodovod prikopčaju i ostale korisnike koji su građani.

SADETA BRKIĆ – pomoćnica načelnika

Ovo je prijedlog o utvrđivanju javnog interesa koji je uslov za provedbu postupka ekspropijacije. Sve ove odredbe koje će dalje pratiti javni interes kao okvir bit će precizirane rješenjima kojima se budu donosile.

MIRSAD OSMANOVIĆ – vijećnik SDP-a

Načelnik je došao do rješenja gdje mi kroz svoje dokumente isključujemo kada se tiče rezervoara, vraćam se da se bolje shvatimo, zašto smo mi suzdržani za neke stvari iz razloga hoćemo da u istu ravan stavimo i građanina, apartmanska naselja i investitora. Međutim, neko od rješenja se provlači posebno kapitaža, gdje isključujemo onog običnog smrtnika koji je tu u okolini, da li rezervoara, da li trase koja prolazi. Dajte da nastojimo da

građanina našeg stavimo u isti položaj i neće biti problema mi ćemo to podržati. Ali vratite se na rješenja slična gdje neko ima veće pravo od nas građana Ilijaša. Načelnik je dobro rekao, vi uzмите u službi radite na ovaj način da smo svi isti i neće biti problema ni za jedno rješenje. Javni interes ekspropijacija, ja sam odustao od rasprava iz razloga, nemojmo da to miješamo to su dva različita pojma.

SADETA BRKIĆ – pomoćnica načelnika

U svakom od ovih prijedloga je posebno precizirano da će ustanovljeno pravo biti knjižno na lokalnu zajednicu općinu Ilijaš. Kada je u tom statusu znači na dispoziciji je svim građanima općine Ilijaš.

DAMIR FILIPOVIĆ – vijećnik SDP-a

U rješenju broja 701/17 u tački 2. gdje piše, korisnik nepotpune ekspropijacije za izvođenje vodovodne mreže za apartmansko naselje je općina Ilijaš, možda samo da idemo za apartmansko naselje i uslužnost građanima općine Ilijaš, da dodamo taj segment da se radi o javnom interesu.

SADETA BRKIĆ – pomoćnica načelnika

Takvo pravo se ne može proknjižiti niti provesti kroz zemljišnu knjigu, uslužnost građanima općine Ilijaš, dovoljno je pravo uslužnosti u korist općine Ilijaš.

Diskutanata po ovoj tački dnevnog reda nije bilo, pa je Općinsko vijeće jednoglasno usvojilo uz primjedbu Damira Filipovića, a koja se odnosi da se u rješenjima pod c, d i e u tački II izbrišu riječi "za apartmansko naselje"

Rješenja iz imovinsko-pravne oblasti pod

- a) broj:06/1-31-294/17
- b) broj:06/1-31-609-1/17
- c) broj:06/1-31-701/17
- d) broj:06/1-31-893/17
- e) broj:06/1-31-1402/17
- f) broj: 06/1-31-1879/17
- g) broj:06/1-31-3195/17

Nakon što je iscrpljen dnevni red, zamjenik predsjedavajućeg Alen Hasković zaključio je dvanaestu sjednicu OV-a Ilijaš u 11:30h.

Zapisničar:  
Maida Habibović

ZAMJENIK PREDSJEDAVAJUĆEG  
OPĆINSKOG VIJEĆA ILIJAŠ

Alen Hasković, MA šum.

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:160200000710645  
e-mail [ov@ilijas.ba](mailto:ov@ilijas.ba)  
Broj certifikata:20938

